

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KEEMPATBELAS**

PERTANYAAN : JAWAB LISAN

**DARIPADA : PUAN HAJAH NATRAH BINTI ISMAIL
[SEKIJANG]**

TARIKH : 13 MAC 2019

SOALAN : 49

Puan Hajah Natrah binti Ismail [Sekijang] minta MENTERI DALAM NEGERI menyatakan langkah yang diambil oleh Kerajaan dalam menyelesaikan isu kewarganegaraan yang tiada kesudahan agar tidak timbul permasalahan kepada anak-anak dalam mendapatkan hak yang sepatutnya.

JAWAPAN

Tuan Yang di-Pertua,

Bagi kanak-kanak berumur kurang dari 21 tahun yang bertaraf bukan warganegara, ibu bapa atau penjaga yang sah boleh mengemukakan permohonan untuk kanak-kanak itu memperoleh kewarganegaraan Malaysia melalui pendaftaran, jika telah memenuhi syarat-syarat yang ditetapkan oleh Perlembagaan Persekutuan dan perundangan yang berkaitan dengan pendaftaran perkahwinan, pendaftaran kelahiran, pengangkatan yang sah serta lain-lain perundangan berkuatkuasa.

Berdasarkan kepada rekod Jabatan Pendaftaran Negara (JPN) dari tahun 2013 hingga 15 Februari 2019, sebanyak 51,399 permohonan kewarganegaraan melalui pendaftaran di bawah Perkara 15(2) dan Perkara 15A telah diterima. Daripada jumlah permohonan berkenaan, sebanyak 1,686 permohonan telah diluluskan dan 34,286 permohonan sedang diproses, manakala 13,420 permohonan ditolak serta 2,007 permohonan dibatalkan kerana tidak memenuhi syarat yang ditetapkan dalam Bahagian III, Perlembagaan Persekutuan.

Kementerian melalui Jabatan Pendaftaran Negara (JPN) sentiasa mengambil langkah proaktif dalam memastikan urusan pendaftaran dokumen pengenalan diri individu yang berkelayakan dapat dilaksanakan dengan mudah di seluruh negara termasuk di kawasan pedalaman dan luar bandar melalui inisiatif berterusan seperti mana berikut:-

- i. Perkhidmatan menerusi Program Turun Padang (Program *Outreach*);
- ii. Perkhidmatan melalui Unit *Mobile*; dan
- iii. Perkhidmatan melalui Bas *Mobile*.